

Jemsko Sokome Nakayáñoní

Iñondutu Unipareko Ñuno Uró

Mande Kembé

Komo suki uni kato sokome ña **Grik** mandewore nakayáñaró, ko eneño owí nekaró, “Jems,” yaró. (*Jems 1:1* weyo qembe.) Quko do Jems horémbo nakayáñaró, nore hamó kama iñoyoteto. Itaka iño-iño uni kumimbo ñande ye iñoyotenggo, ko Jems ñuko Yesu koro koneyó nañge. Koretero, Yesu nokono yaró quño ñuno, koneyómbo iñondutuwooro kama howeyañgo. Quko Yesu khumoro otoqaró quño iñondutuwoyáñgurí. Ñunde tero imemonggo Jemsko **Anutu koro huru-huru** Yerusalem yora quro uni kembé tunoqaró. Yate, kumima naru 62AD ñuno, **o qa-qa unindoro tapá uni** ka, owí muko Ananus, ñundo Jems toworo uroní khumaró. (Asa “62AD” murí muko ñandiro, ko Yesu nimí pisiyaró, yate kumima naru 62 ñunde rotaró. Nore kumima naru 2,000 ñunde rotoro yate itaka yoteto.)

Do naru horé nakayáñaró ñuro kama iñoyoteto. Nore ñande ye iñoyoteto, ko 49AD ñuno **Anutu koro huru-huru** koro tapá unindo Yerusalem ñuno huruwooro Jemsko huru-huru ñu sopoyaró. (*Asá yerewí Uni 15* weyo qembe) Huru-huru ñunoko o parámi karo epe mito-mito tañgurí. O parámi ñuko ñandiro, ko **uni wini meyowo** ñu iñondutu unipare date tunoqewañgo. Asa Jems koro sokomeko ñano o parámi ñuro kama yaró. Ñunde ñuroko huru-huru ñu kama tunoqeyoní sokome ñu nakayáñaró, peka.

Ñuya ñu naruko ñuno naru piyimi irisa tunoqariyó: 34AD ñunoko Solko iñondutu unipare yorero kusi-kusi yano yorotoyaró. (*Asá yerewí Uni 8:1; 9:1-2* weyo qembe.) Imemonggo, 44AD ñuno, Herot Antipasko iñondutu unipare quhurí yunoro Jems, Sepeti koro nañuní ñu uroní khumoní Pita rero kusi-kusi yano rotaró. (*Asá yerewí Uni 12:1-4* weyo qembe.) Naru piyimi ñunoko iñondutu unipareto sorero mirane-mirane toñeggurí. Asa ko Jemsko sokome ñako 45AD ñuno unipare sorañgurí quro nakayáñaró, peka.

1 ¹No Jems, no Anutu koya Uni Parámi Yesu Kristo^a koro sunará simó qu. Nondo sokome ña nakayáñoro rewe wini 12 mirane-mirane yoteño qu^b yeno uyarete. Naru meté.

Quhurí korowoyoteño ñuro ñingu-ñingu ti qembe

²Topo-topone, o kate-kate ye towo yereyote quno ñuno ñingu-ñingu ti qembe. ³Ye ñande ñi qembe, o kato yeño ñondutuye towoñote quno ñuno ye kondé kañero quhurí korowowero quro wimbu reyoteño. ⁴Ko wimbu ñuko khoyó tiní kini tiní yeko ño-ñoye meté mu rero o soso mepémo tero o karo tukuni kama tewañgo.

⁵Asa ye keweroyemo uni kanata kato ño-ño metémboro tukuni teroqo, ene meté Anutu kirayoní ño-ño inoweya. Anutuko yeño kiraye soso ñuro sangírí kama tero parámi yunoyote. ⁶Quko uni ñundo ñondutu hamó nañge rero Anutu kirayoweya. Ñande ma ye ñowero, “Anutuko ñumbeka nunoweyape ma kini?” Dokoro uni ñunde ye ñoyote ñuko windi matúmbo okokowoní uyare maheyote ñunde qembe. ⁷Hamó, Anutuko uni ñunde qu o kirayaró ñu kama inoweya. ⁸Uni ñundo newondí irisa tero, o soso wimbo-wimbo teyote.

⁹Ñondutu uni kato onoyó moré kini tiníqo, ene meté ñingu-ñingu teweya, dokoro Anutu koro toñímo owé parámi reweya. ¹⁰Quko onoyo uni ñuko Anutuko owéye riní umbute ñuro ñingu-ñingu teweya. Dokoro ñundo nuño sikuno wotero asáqeyote qu qembe kini teweya. ¹¹Qeni, kosa kondé rañoro nuño qeniní asáqero tondañe umbuní nakayáño meté ñu soso kini teyote. Ñundiro nañge onoyo uni ñundo khe u-uyó howeyate kini teweya.

¹²O kato uni towoñoní kondé kañero quhurí korowoyote tiníqo, puriño ka rete. Dokoro enendo towo-towo ñu takaní kini tiníqo, o meté horé mu reweya. Komo Anutuko mande kusiyoro ñande yaró, “Nondo uni soso newonde meté nunoyoteño qu o meté yunowano,” yaró. Asa o meté ñu yoto-yoto suki-suki nañge.

¹³Asa o kato uni ka towoñoníqo, ñande ma yewero, “Anutuko towo nerete.” Dokoro uni piyimimbo Anutu ma towoñowero, ko Anutu enejombo uni ñunde kama towo yereyote. ¹⁴Quko nore newondenanimbo otoqoro noreño towo nereyote. Noreño ño-ñonani piyimi ñundo noreño kaná yerero o quhurí tewero yowosoyote. ¹⁵Ño-ñonanimbo nore nowosoro qahu tero o quhurí ka simó qembe pisiyote. Pisiyoní o quhurí ñundo parámi teyate nore noriní khumowato.

^a 1:1 “Yesu Kristo” - komo suki ye-ye unindo Anutuko uni ka rokóñoní mahero wiri yerete uni parámi horé tunoqeweya qu karo yanqurí. Juda unipareto uni maheweya ñu, “Kristo,” ma, “Mesaiya,” ye nekañgurí. Asa Yesu mahiní enejo unipareyó, “Kristo Yesu,” ma, “Yesu Kristo,” nañge ye nekañgurí. ^b 1:1 “wini 12 mirane-mirane yoraño” ñuko Juda koro unipareto ñondutu tañqurí.

¹⁶Topo-topone hamó, kondé inji. O kato ye kaná yereweya koro.
¹⁷Puriño meté horé soso ŋuko koreko qu, asa Awa sambo koro
 hiyó yondowaró qu nonŋo umbuyote. O kato kosa saki raŋoro iño-
 iñojóyó wisumuŋoro rohoréŋoní iño-iño enesó-enesó kama howeyote.
¹⁸Eneŋombo awanani tero mande hamówore nore pisi niriní o soso
 towaró ŋuro korete-korete qu, asa kho ŋuro eŋgé korete qu qembe yoteto.

Anutu koro mandí iño howi qembe

¹⁹Topo-topone hamó, ye mande ŋaro hamó iñojóyí qembe. Ye soso waka
 ta kusumbo ri qembe, mande topé imemoŋgo yi qembe, saŋgiri waka ma
 tewero. ²⁰Dokoro unindoro saŋgiriyembo Anutu koro otete roneneŋowí^c
 ŋu riní kama tunoqeyote. ²¹Ŋunde ŋuroko o pusú soso se rotoya otete
 piyimi meyowo ŋuya se rotoya yeŋomboro iñojóyí umbuní mande Anutuko
 re newondeyemo rimiró ŋu iñojóyí qembe. Mande ŋundo nange yeŋo
 yuqaye ŋu rambaruru koŋgo yoreweya.

²²Anutu koro mandí iñojóyotēŋo ŋu howeyuri qembe. Mande ŋu kina
 iñoŋoro rotowaŋgo tiníqo, ye kota-kota uni ŋunde yorowaŋgo. ²³Dokoro
 uni kato mande ŋu kina iñoŋoro rotote ŋuko uni kato sono koŋiwímo umu-
 kembé qenete ŋunde qembe. ²⁴Asa qene rotorogo waka ta umu-kembé
 datiro ŋu kape teyote. ²⁵Quko uni kato hutuŋo mande meté mu, hutuŋo
 mande ŋu nore norero o kusi nerewí qu toŋo wisiyote, ŋu kondé qeneyote
 quño ŋuno, enendo kina kama iñojóyote. Kini, iño howeyote. Howero meté
 horé yoweya.

²⁶Uni kato ŋande iñojoweya, “No Anutu potoruku hamó te inoyoteno,”
 yeweya, quko ene maŋgó meté kama sopoyoweya tiníqo, eneŋombo
 eneŋo kanáŋoyote, potoruku wimbo-wimbo te inoyote. ²⁷Potoruku sara
 memeri mu te inowato ŋuko ŋandiro: wapu, qoqewo ŋuro iñoŋoro quhuríye
 korowoyoteto. Ko noko koro otete piyimi mu kama howeyoteto. Anutu
 Awananimbo otete ŋuro hamó ijote.

Uni soso koro otete kanata howi qembe

2 ¹Topo-topone, yendo Uni Parámi meté horénani Yesu Kristo^d ŋuro
 iñoŋodontuwoyotēŋo. Asa ko uni karo metéŋoro karo piyimiŋowero
 murí ŋu ma tewero. ²Qeni, naru kano uni kato tuwi meté mu se
 punuworo kandí pusirímo tombo gol qu rero huru-huru yano oweya,
 peka. Oníqo, onoŋojóyó moré kini qu kato tuwi wurisusukawí se punuworo

^c **1:20** “*otete roneneŋowí*” ŋuko Anutuko nore rokó yiriní noreŋo murínani eneŋo murí
 howeyote. ^d **2:1** “Yesu Kristo” - komo suki *ye-ye unindo* Anutuko uni ka rokóŋoní mahero
 wiri yerete uni parámi horé tunoqeweya qu karo yaŋgurí. Juda unipareto uni maheweya
 ŋu, “Kristo,” ma, “*Mesaiya*,” ye nekaŋgurí. Asa Yesu mahiní eneŋo unipareyó, “Kristo
 Yesu,” ma, “Yesu Kristo,” nange ye nekaŋgurí.

oweya. ³Ꞥunde tiriqo, yeko peka tuwi meté mu punuwote Ꞥu Ꞥande mirowaꞤgo, “Ke mahe, yakutí metémo Ꞥano kundite,” yewaꞤgo. Ko uni oyó wurisusukawí Ꞥuko Ꞥande mirowaꞤgo, “Ke anduno kaꞤe,” yewaꞤgope ma, “Makono naꞤge kundite,” yewaꞤgo, peka. ⁴Asa ye otete Ꞥu tewaꞤgo tiníqo, iꞤondutu piyimi tero uni ronda yerero Ꞥande yero iꞤoyotenga, “Ꞥako uni meté, anduko uni piyimi.”

⁵Topo-topone hamó, iꞤi. Komo Anutuko mande ka kusiyoro Ꞥande yaró, ko eneꞤo unipareyó wiri yereweya naruyómo Ꞥuno uni soso newonde meté ene inoyotenga Ꞥundo o meté horé siyowaꞤgo. Ꞥundiro naꝼge enendo uni nokono ꝼano onoꝼoye moré kini ꝼu rokó yirini iꝼondutu parámi tero o meté horé siyowaꝼgo. ⁶Quko yendo uni onoꝼoye moré kini ꝼuro yesará yereyotenga. Iꝼi, onoꝼo uni kumimbo quhurí ye saꝼayemo rero yorero mande khono uyotenga, hamómbe? ⁷Ko onoꝼo uni ꝼundo Anutuko owé ye yunaró ꝼu^e yesaráꝼoyotenga, hamómbe?

⁸Wiri yerete unindoro hutuꝼo mande ka sokomeko^f ꝼuno yote ꝼuko ꝼandiro, “Ye yeꝼomboro iꝼoyotenga ꝼunde naꝼge uni topoyemboꝼo ꝼunde na iꝼoyuri qembe.”^g Asa hutuꝼo mande ꝼu howewaꝼgo tiníqo, o meté tewaꝼgo. ⁹Quko yendo uni kumimbo metéꝼoro uni kumimbo piyimiꝼoyotenga tiníqo, quhurí tero ye hutuꝼo mande wendaqewero uni tunoqetenga. ¹⁰Dokoro uni kato hutuꝼo mande ꝼu soso howeyote, quko hutuꝼo mande kanata naꝼge wendaqete tiníqo, hutuꝼo mande soso wendaqete. ¹¹Qeni, Anutuko ꝼande yaró, “Ye uni meyowo karo parímboya se simbururu ma tewero.”^h Yero ꝼuya, “Uni kama yuri khumowaꝼgo,”ⁱ ꝼunde yaró. Asa ko ke uni meyowomboro parímboya se simbururu kama teweya, quko uni ka uroyi khumote tiníqo, asa ke hutuꝼo mande wendaqewero uni tunoqete.

¹²Hutuꝼo mande ꝼundo o nore kusi nereyote qu toꝼo wisiyote. Quko mande ꝼundo imemoꝼgo otetenani rondaꝼeweya. ꝼunde ꝼuroko ye maꝼgoye, oteteye meté sopoyuri qembe. ¹³Dokoro Anutuko uni kato sikíye kama te yunoyote ꝼu sikí kama te inoro topé piyimi inoweya. Quko sikíye te yunowero murí ꝼuko topé piyimi ꝼu takaweya.

Iꝼondutuyemboꝼo engé rika tunoqini

¹⁴Topo-topone, uni kato ꝼande yeyote, peka, “Nondo Anutu iꝼondutuwoyoteno,” yete, quko otete meté kama howeyote tiníqo, do meté ka tunoqeweya? Iꝼondutu ꝼunde qundo ene rambaruru koꝼgo reweyape ma kini? Kini. ¹⁵Asa naru kano topoye kato kowe punu-punuyó moré kini, ko o qímboꝼo ꝼuya khumoyote, peka. ¹⁶Ye keweroyemo

^e 2:7 Owé ꝼuko Yesu koro owí naꝼge, sono raꝼgurí quno ꝼuno owí ꝼuya raꝼgurí.

^f 2:8 “sokome” ꝼuko Anutu koro mande korete qu, asa Murí Tero yate Malakai kini tete.

^g 2:8 O Qa-qa Uni 19:18 ^h 2:11 Toꝼjengurí 20:14 ⁱ 2:11 Toꝼjengurí 20:13

kato, “Ke newondeke ime yoní. Uya tuwi re koweke punuwoya o neka qahunge tinditini,” nunde mirote, quko o nu kama inote tiniqo, do meté ka tunoqeweya? ¹⁷Norejo ijondutunani hamó nu nuya nundiro nanje. Ijondutunanimbo otete meté mu rini kama tunoqeyote tiniqo, ijondutunani nuko yoto-yotoyó moré kini, khumowí tete.

¹⁸Quko uni kato nande yeweya, peka, “Uni kako ijondutu nanje teyote, kako otete meté mu nanje teyotengo.” Asa nondo mande topé nande yewe teteno, “Ke otete meté kama teyote tiniqo, kejo ijondutuke witu nerewero mepémo kini. Quko otetene meté mundo ijondutune witu kereyote.” ¹⁹Keto nande ijondutuwoyote, asa Anutu kanata na yote. Nu meté. Quko yuqa piyimi nuya^j ijondutu nunde qu teyotengo, ko ene hamó yukuwoyotengo.

²⁰Nondo yeteno, ijondutunanimbo otete meté mu rini kama tunoqeyote tiniqo, ijondutu nuko wuruwara nanje. Ke uni koroqe, kepe mande naro murí ijowero yete? Asa ijo. ²¹Komo Abrahamko^k nanjuni Aisak rero o qa-qa^l tero wondo yakutímo urowero taró. Nunde tini Anutuko Abraham koro murí nu qenero, uni ronenejowí,^m ye nekoyaró. ²²Meté ijo. Abraham koro ijondutuyómboya o taró nuya kho kopo tiri, asa o taró nundo ijondutuyó rini hamó taró. ²³Nunde tini komo suki mande sokomeko nuno nakayánaró qu ka rini hamó taró. Mande nuko nandiro, “Abrahamko Anutu ijondutuwoní, uni ronenejowí, ye nekaró.”ⁿ Ko Anutuko Abraham koya nande yaró, “Nenejo topone,” yaró. ²⁴Ke nande qene ijoweya, norendo ijondutu kinanje teyoteto tiniqo, Anutuko nore uni ronenejowí ye kama neko yerete. Kini. Otetenani meté mu nuya qenero nore, uni ronenejowí, ye neko yerete. ²⁵Nunde nanje khe pare Rahapko uni Josuako asá yirini uyarenguri nu yorero sopo yirini khe kawore uyarenguri. Nunde tini Anutuko pare nu, ronenejowí, ye nekaró. ²⁶Nore ijoteto, kowenani ka yuqayó moré kini muko, nuko khumowí. Nunde nanje uni ka ijondutu kinanje tete, quko otete meté kama teyote tiniqo, asa enejo ijondutuyó muko khumowí.

Mangoye kondé sopoyi qembe

3 ¹Topo-topone, danimbo mande rondaqe unipare yunoyotengo nu, imemongo Anutuko oteteye qenero kondé ronda yereweya. Nunde nuroko ye qambu rondaqe-rondaqe uni nunde qu ma tunoqewero.

²Dokoro, nore soso murí piyimi enesó-enesó teyoteto. Hamó, uni kato

^j 2:19 “yuqa piyimi” nuko sambo simó nunde qembe, quko Anutu koro sangiri tero unipare rowore yereyotengo. ^k 2:21 “Abraham” nuko Juda uniparetoro pukoye. ^l 2:21 “o qa-qa” nunde qu unipareto Anutu ijoro potoruku te inoro nú-qare ka o qa-qa uni inoyi uroní khumoní wondo yakutímo nuno qaró. ^m 2:21 “uni ronenejowí” nuko Anutuko qenero potó moré kini tini enejo uniyó tunoqete. ⁿ 2:23 Murí Tero 15:6

mande piyimi kama yeyote tiníqo, eneko uni meté horé, ko kowí soso meté sopoyote.

³Qeni, norendo hosi^o sopoyowero quro aini sombé ka rero maŋgómo reyoteto. Ijunde tero aini sombé ŋu wosoyoteto quno ŋuno hosi kowí soso noreŋo iŋo-iŋo qu howeyote. ⁴Ko qeni, waŋgo parámi ŋu, matú wimbí parámi ŋundo huwoní windi saŋawore kheŋgeŋo toŋeyote. Quko soso-unindo tesanŋa tomó ta ka rero sono saŋaworo waŋgo parámi ŋu riní eneŋo iŋo-iŋoyó howero khe ka howeyote. ⁵Ijunde nanŋe, mipi ŋuko kowenanimboro sombé tomó ta ka, quko mira windu-windu tero eneŋo owí hokoyote. Nore iŋoteto, te kisó tomó ta qaro kewá parámi tero siku soso qamukoweya. ⁶Ko mipinani ŋundo te kisó qembe tero kowenanimboro sombé-sombé keweroko ŋuno o piyimi kate-kate riní tunoqeyote. Hamó, kowenani soso riní pusú teyote, ko kewá qembe tiní yoto-yotonani soso qayote, ko kewá ŋuko Monimbu koro kewá qu nanŋe.

⁷Qeni, sikuwore nú-qare enesó-enesó, sire-paquí enesó-enesó, o soso windi quroko yoteŋgo qu enesó-enesó, uni kato soso ŋu meté soso yereyoteŋgo, ko soso ŋuko unindoro iŋo-iŋoye howeyoteŋgo. ⁸Quko uni kato eneŋo mipí sopowero mepémo kini. Mipinani kama imaŋete, naru rokóŋoro otoqoro mande piyimi yeyote. Ijuko sono oŋgomi piyimi maŋgorero uni yuroní khumoyoteŋgo.

⁹Mipinani muko Uni Parámi ŋu, Anutu Awandoro owí hokoyote. Ijuya ŋuko takuni mande yero uni saŋano reyote. Quko Anutuko uni ŋu riní eneŋo kiraró tunoqaró. ¹⁰Anutu owí hokoyoteto ijuya takuni yeteto ijuya, mande irisa-irisa ŋu maŋgó kanata quwore nanŋe yeyoteto. Neneŋo topo-topone, ŋu otete ŋu ma tewero. ¹¹Sono umó kanata qu noŋgo sono nuŋgurí koya sono oŋgomi koya irisa-irisa kama tunoqeyotiri. Kini. ¹²Topo-topone, metémbe te fik ŋundope oliv koro eŋgé riní tunoqeweya? Ko utó wain ŋundope fik koro eŋgé riní tunoqeweya? Ijunde nanŋe windi koro sono ŋundo rohoréŋoro sono meté newero qu ŋunde kama teweya.

Iŋo-iŋo meté mu irisa ŋuro yete

¹³Ye dani kato o soso meté rondaŋewero ko iŋo-iŋoyó moré? Uni ŋunde qundo eneŋo yoto-yotoyó meté mu ŋande witú nereweya, asa iŋo-iŋo meté mu tero eneŋo riní umbuní murí meté mu teweya. ¹⁴Quko keto uni kaya iŋo-iŋo piyimi newondekemo iŋoro naru rokóŋoro owéŋge hokowero ore seqayote tiníqo, asa iŋo-iŋo piyimi ŋuro niŋgu-niŋgu ma tewero. Ko muríŋgeporo kota ma yewero. ¹⁵Iŋo-iŋo ŋunde quko sambo koŋgo kama umbute. Kini. Ijuko noko koro qu nanŋe, newonde komo qu noŋgo maheyote, Monimbuko riní areyote. ¹⁶Dokoro, ye keweroyemo kato uni kaya iŋo-iŋo piyimi newondímo iŋoro naru rokóŋoro eneŋo owí

^o 3:3 “hosi” ŋuko númbowe parámi ka, unindo saŋano kunditero kheko uyareyotero.

hokowero ore seqayote tiníqo, ye keweroyemo ηuno o soso piyo tiní otete piyimi kate-kate tunoqeyote.

¹⁷Quko uni iño-iño sambo koŋgo umbuyote qu howeyote ηuko ηandiro. Koretero, eneño iño-iñoýo sara-sara nanqe teyote. Ko sanjiríño moré kini newonde ime yote, topé-topémboro iñoýote, topé-topé kusunoyemo yote, unipare sikíye te yunoro samaka yereyote ko otete meté teyote, uni soso koya murí kanata howeyote, mangó irisawore kama yeyote. ¹⁸Uni kato unipare newonde ime yunoyoteŋgo quno ηuno o yuwoyó ka rero rimitenŋo ηunde qembe. Re rimiri wote enŋé teweya. Enŋé ηu otete roneneŋowí^p nanqe.

Anutu koro kusunoyómo yuri qembe

4 ¹Ye dokoro kiro mande yero kuma teyotenŋo? ηandiro peka, asa ye enemo-enemo oka rewero quro iño-iñoýe muko ye keweroyemo kiro kuma teyotenŋo, hamómbe? ²Ye, oka rewato, ye iñoýotenŋo, quko o ηu kama reyotenŋo. Yendo uni topoyembo o meté mu qene nuŋguworo rewero quro yuri khumoyotenŋo, quko o ηu siyowero mepémo kini. Kiro mande yero kuma teyotenŋo. O ηu kama reyotenŋo, dokoro ye Anutu o ηuro kama kirayotenŋo. ³Quko ηunde kirayotenŋo tiníqo, iño-iñoýe piyimi ka yote, asa yeŋomboro niŋgu-niŋgu tewero quro nanqe o ηuro ene kirayotenŋo. ηunde ηuroko Anutuko o ηu kama re yunoyote.

⁴Ye se simbururu unipare ηano qu, iñoýi. Uni ka noko koro o quro hamó iñoýote qundo Anutu sanjirí te inoyote. ηu iñoýotenŋope ma kini? Dani kato noko koro quro topé teweya ηuko Anutu koro sanjiríño tunoqeweya. ⁵Sokomeko^q ηuno ηande yete, ko Anutu eneŋombo yuqanani riní nore quroko uní yuqa ηundo newonde piyimi tero kondé iñoýote. Ye date iñotenŋo, mande ηuko kina mandepe ma kini? ⁶Quko Anutuko samaka-samaka tuwó^r parámi nore nunoyote. ηunde ηuroko sokomeko ηande yete,

“Anutuko uni eneño owí hokoyote ηu yoríní umbuweya,
quko eneŋomboro iñi umbuníqo, samaka-samaka tuwó inuweya.”

⁷ηunde ηuroko ye yeŋomboro iñi umbuní Anutu koro kusunoyómo yuri qembe. Ye Monimbu pitoyikata yorotoro soreweya. ⁸Ye wosoya Anutuko uyari. ηunde ti ene ηuya woso yeno maheweya. Yeko quhurí uni, kandeyembo o quhurí teyote ηu se rotoyi. Yeko newonde irisa uni, newondeyemo o piyimi ηu se rotoyi. ⁹Ye newonde surumí tero tendo

^p 3:18 “otete roneneŋowí ” ηuko Anutuko nore rokó yiríní noreño murínani eneño murí howeyote. ^q 4:5 “sokome” ηuko Anutu koro mande korete qu, asa Murí Tero yate Malakai kini tete. ^r 4:6 “samaka-samaka tuwó ” ηuko Anutu eneŋombo nore samaka yereyote. Kimoyó moré kini.

parámi ti. Yomo ma tewero, tendi. Niŋgu-niŋgu ma tewero, newonde surumí ti. ¹⁰Ye Uni Parámimboro toŋímo yeŋomboro iŋi umbuníqota Uni Parámimbo owéye hokoweya.

¹¹Topo okite, mande piyimi epe ino-ino ma tewero. Uni ka topémboro oteteyó qenero ene rondañeyotepe ma yesaráŋoyote ŋundo Anutu koro hutuŋo mande riní umbuyote. Ko uni kato topé-topé ronda yereyote tiníqo, hutuŋo mande ŋu rondañeyote. Iŋunde tero hutuŋo mande ŋu rondañeyote tiníqo, mande ŋu kama howeyoteŋgo. ¹²Ronda-ronda uni horé kanata naŋge yote. Ko hutuŋo mande ye-ye uni horé kanata naŋge yote. Eneŋombo unipare rambaruru yereweyape ma yoriní meté tewango. Quko yeko owéye moré kini. Yendo topo-topoye ronda yerewero mepémo kini.

Yeŋo owéye ma hokowero

¹³Iŋi, ye kumimbo ŋande yeyoteŋgo, “Indika, itakape ma kuyepope toŋero yendé kembé kano mone kho tewano. Ko kumima naru kanata ŋunde rotoro mone parámi rewano.” ¹⁴Iŋunde yeyoteŋgo, quko ye date iŋoteŋgo? Kuyepo do ka tunoqeweya? Yendo ŋu kama iŋoteŋgo. Dokoro yoto-yotoye muko koporé ŋunde qembe. Itaka yote, quko waka ta kini teweya. ¹⁵Iŋandiro naŋge yi qembe, “Anutuko ŋunde iŋoníqo, nore ŋundiro tewato.” ¹⁶Quko itaka yeŋo owéye hokoro yeŋombo do ka tewango ŋuro yeyoteŋgo. Mande ŋuko piyimi horé. ¹⁷Iŋunde ŋuroko uni kato otete meté ŋu iŋomukote, quko otete meté ŋu kama howeyote tiníqo, enendo quhurí tete.

Ye onoŋo unipare, ininiyaqe

5 ¹Ye onoŋo unipare, iŋi. Quhurí parámi yeno tunoqeweya. Ye quhurí ŋuro iŋoya tendoya ki parámi horé ti qembe. ²O puŋge situwiye piyo teweya, ko siwímbo tuwiye ŋu nemukoweya. ³Naru weŋa ŋuko tukuni tete. Quko ye itaka mone parámi kopoyi kina yoní unipare kama samaka yereyuri paráqimbo mone ŋu riní piyo tete. Uni soso paráqi ŋu qenero muriyembo iŋomukowaŋgo. Ko otete piyimi ŋundo kewá qembe tero koweye riní qaweya. ⁴Iŋi. Kho uniyembo yeŋo kho qu tero khoye roŋgaruwoyaŋgurí. Quko yendo kho ŋuro kimoyó kama yunaŋgurí. Otete piyimi ŋuro kho uniyembo ki parámi tiqo, Anutu Wimbí Moré ŋundo ki ŋu iŋaró. ⁵Yendo noko ŋano yotoro onoŋo parámi rero yeŋombo naŋge yeŋomboro niŋgu-niŋgu teyoteŋgo. Ye o qoyembo parámi ni koweye po qembe tinditete. Quko itaka naŋge po yurowero naruyó tunoqete. ⁶Yendo uni o piyimi ka kama taŋgurí qu, unindo yeya saŋgirí kama taŋgurí qu, ŋu yorero topé piyimi yunoro yuri khumaŋgurí.

Quhurí koroworo kisikasa mande ma tewero

⁷Iŋunde ŋuroko, topo okite, ye newondeye rukisoyoya quhurí soso korowoya Uni Parámi pitu ko maheweya ŋu sopoyi qembe. Qeni, kho

simburí muko kho meté engé tiní yero sopoyote. Newondí rukisoyoro sono korete qu, sono weña qu umbuwero ñuro soponí^s mepémo tiníqo, engé siyoweya. ⁸Ye ñuya newondeye rukisoyoya kondé kañero quhurí soso korowoyi Uni Parámi pitu ko waka ta maheweya. ⁹Topo okite, ye kisikasa mande ma yewero. Yate ronda-ronda uni ñuko topé piyimi topé te yunoweya koro. Qeni, ronda-ronda uni ñundo makono kañeyote.

¹⁰Topo okite, ye-ye unindo Uni Parámimboro owímo yeyanjo ñuro inji. O piyimi eneno tunoqeyara, quko newondeye rukisoyoní quhurí ñu korowoyanjo. ¹¹Qeni. Nore ñande yeyoteto, “Uni kondé kañero quhurí korowoyotenganjo ñuko meté horé yowanjo.” Ye Jop koro sowo mandeyó injoyotenganjo, ene kondé kañero quhurí korowoyara. Ko imemongoko Uni Parámimbo o meté te inaró. Dokoro Uni Parámimbo noreño hamó-hamó surumí injoyote, ko suki-suki sikínani te nunoyote.

¹²Topo-topone, o parámi horé ka ti qembe. O parámi ñuko ñandiro: ye mandeye ri kondérewero quro o meyowo ka, asa sambope ma nokope ma o meyowo ka ma nekowero.^f Kini, ye “Iyo,” ye inoroqo, “Iyo,” ñu nanje yi qembe. Ko, “Kini,” ye inoroqo, “Kini,” ñu nanje yi qembe. Anutuko topé piyimi mu te yunoweya koro.

Anutu inondutuwoya hariri ti qembe

¹³Ye keweroyemo kato quhurí korowoyote tiníqo, asa ene meté Anutuware hariri teweya. Kako newondímo ñingu-ñingu tete tiníqo, ene meté yambo yero Anutu owí hokoweya. ¹⁴Ye keweroyemo kato se khumo teroqo, ene meté huru-huru koro tapá uni ñu neko yiriní mahewanjo. Mahero Uni Parámimboro owímo sono kiruwó se kowímo hausuworo, ko Anutuware hariri tewanjo. ¹⁵Ko uni kato Anutu inondutuworo hariri tiqo, Uni Parámimbo se khumo uni ñu riní meté tewanjo. Ko uni ñundo quhurí ka taró tiníqo, Anutuko quhurí ñu re rotoweya. ¹⁶Ñunde ñuroko ye enemo-enemo yeño quhuríye epe mitomito tero topo-topoye samaka yerewero hariri tika Anutuko ye yoriní meté tewanjo.

Uni roneneñowí kato hariri teyote ñuko haririyó wimbí moré. ¹⁷Elaija^u ñuko uni noreño kirarónani, ko enendo kondé hariri tiní sono kama umbuyoníyate kumima naru kapusa ko kombo kande sanjyoro kanata ñunde rotaró. ¹⁸Tukú pitu ko hariri tiní sambo koñgo sono riní umbuyoní o khono qu engé taró.

^s 5:7 Juda koro mirayemo ñuno naru irisa quno nanje sono umbuyaró. Naru korete quko Novemba koya Desemba; naru weña quko Mas koya Epril. Asa naru irisa ñuno sono parámi umbuníqo, kho ñuko engé parámi teweya. ^f 5:12 Ñu naruko ñuno uni kato eneño mande kusiyaró ñu kondérewero quro mande kañuya yaró. Mande kañuya ñuko eneño mandí wimbí inoní uni meyowo ñande ye inowanjo, peka, “Enendo mande hamó nanje yete.”

^u 5:17 “Elaija ” ñuko komo suki Anutu koro ye-ye uni yora.

¹⁹Topo-topone, ye keweroyemo kato Anutu koro khe hamó ŋu rotoro toŋiní, ko topé kato re rohoréŋote tiníqo, ²⁰ŋande iŋoyi qembe: asa uni topo kato quhurí uni ka re rohoréŋoni kheyó piyimi mu rotoweya, ŋundo quhurí uni ŋu rambaruru koŋgo reweya. Ijunde tero quhurí parámi weheŋoweya.